

## **DOMINGU II PÁSKUA – TINAN B** *(Domingo da Divina Misericórdia)*

### **Tema**

Liturjia domingu ne'e nian apresenta mai ita comunidade Ema Foun sira nian ne'ebé moris husi Jezús nia krús no resurreisaun: Igreja. Ninia misaun mak hatudu ba ema sira moris foun ne'ebe mosu husi resurreisaun.

Iha *leitura dahuluk* ita iha, “fotografia” comunidade sarani Jerusalém nian, trasu sira comunidade ideál nian: comunidade ida forma husi ema oioin, maibé moris fiar ida hanesan ho fuan no klamar ida de'it; comunidade ida ne'ebé hatudu domin fraternu ho jestu konkretu partilla no don nian no katak, ho forma ne'e, fó sasin kona-ba Jezús moris-hi'as.

Iha *Evanjellu* ideia ida maka'as liu mak Jezús ne'ebé moris no moris-hi'as sai sentru comunidade sarani nian; comunidade estrutura an hadulas Nia no husi Nia mak comunidade simu moris ne'ebé anima nia no fó kbiit atu enfrenta difikuldade no persegisaun sira. Husi sorin seluk, iha moris comunidade nian (liturjia, domin, sasin) mak ema sira hetan prova katak Jezús moris hela.

*Leitura daruak* fó hanoin ba membru sira comunidade sarani nian kritériu sira ne'ebé define vida sarani auténtika: fiar-na'in loos nian mak ema ne'ebé hadomi Maromak, adere ba Jezús Kristu no ba proposta salvasaun nian ne'ebé, liuhusi Nia, Aman halo ba ema sira no moris iha domin ba maluk sira. Ema ne'ebé moris nune'e, manán mundu no integra an iha família Maromak nian.

### **LEITURA I – Apóst. 4,32-35**

“Apóstolu sira-nia Hahalok” mak katekeze ida kona-ba “etapa Kreda nian”, katak, kona-ba forma oinsá dixípulu sira asume no kontinua projetu salvasaun Aman nian no lori – liutiha Jezús husik mundu ne'e – ba ema hotu.

Livru fahe ba parte rua. Iha parte dahuluk (kf. Apóst 1-12), apresenta difuzaun Evanjellu nian iha fronteira Palestina nia laran, hodi Pedro no Sira Na'in Sanulu-resin-rua nia asaun; daruak (kf. Apóst 13-28) apresenta espansaun Evanjellu nian iha Palestina nia li'ur (to'o Roma), liuliu hodi Paulo nia asaun.

Testu ohin nian pertense ba parte dahuluk Livru Apóstolu sira-nia Hahalok. Nia halo parte ba grupu sumáriu tolu nian, ne'ebé Lucas uza atu haktuir aspetu fundamentál sira vida comunidade sarani Jerusalém nian. Sumáriu dahuluk dedika ba tema unidade nian no impaktu ne'ebé estilu sarani moris nian provoka ba povu sidade nian (kf. Apóst 2,42-47); sumáriu daruak (mak testu ohin propoin mai ita) refere liuliu partilla rikusoin nian (kf. Apóst 4,32-35); datoluk trata kona-ba sasin ne'ebé Kreda fó liuhusi atividade milagre nian ne'ebé apóstolu sira halo (kf. Apóst 5,12-16).

Naturalmente, sumáriu sira-ne'e la'ós retratu istóriku rigorozu ida comunidade sarani Jerusalém nian, iha inísiu dékada 30 nian. Bainhira Lucas hakerek relatu sira-ne'e (dékada 80), entuziazmu inisiál sarani nian malirin ona: Jezús ne'ebé sira hein atu instaura definitivamente “Maromak nia Reinu” nunca to'o mai, no persegisaun sira mós hahú mosu... Ho ne'e, hahú mosu sarani ne'ebé sai malirin, entuziazmu tuun, monotonia, divizaun no konfuzau (tanba hahú msou mós mestre falsu sira, ho doutrina estraña no ladún sarani). Iha kontestu ne'e, Lucas fó hanoin kona-ba esensiál esperiénsia sarani nian no trasa quadru ida kona-ba sá loos mak comunidade nia karakterístika sira.

## MENSAJEN

Sá loos trasu komunidadade ideál moris husi Espíritu no apóstolu sira nia sasin?

Uluknanai, komunidadade forma husi ema lahanesan, maibé iha fiar hanesan (vers. 32a). “Fiar” iha Testamentu Foun, mak adezaun ba Jezús no ba ninia projetu. Ba membru hotu komunidadade nian, Na’i Jezús Kristu mak referénsia fundamentál, simentu ne’ebé halo sira hotu sai ida iha projetu komún.

Daruak, komunidadade ida hamutuk, “fuan ho klamar ida” (vers. 32a). Maun no biin-alin sira tenke moris iha komuñau no uniaun tan hotu-hotu fiar iha Jezús. Jezús nia komunidadade labele preokupa de’it atu defende interese pesoál sira; maibé tenke sai komunidadade iha-ne’ebé hotu-hotu la’o iha diresaun ida de’it, hodi tulun malu, partilla valór no ideál hanesan, forma família ida maun no biin-alin sira-nian ne’ebé moris iha domin.

Datoluk, komunidadade ne’ebé partilla soin sira. Husi komuñau ho Kristu mai komuñau sarani sira nian entre sira; no ida-ne’e lori implikasaun prátika sira: hakkribi tipu hptu egoíзму nian, autosufisiénsia, taka iha an rasik no abertura fuan nian ba partilla, ba domin. Espresaun konkreta mak komuñau soin nian (vers. 32b), tau iha komún soin sira, hafoin fahe ba sira ne’ebé presiza (vers. 34-35). Ne’e mak forma konkreta atu hatudu Jezús nia moris foun: libertasaun husi moris-atan egoíзму nian no kompromisu loos domin nian, partilla nian, saran an nian. Iha mundu ida iha-ne’ebé realizasaun no susesu ema nian sukat ho soin ne’ebé ema ida akumulá no la’ós atu partilla, Jezús nia komunidadade simu bolun atu fó ezemplu kona-ba lójika diferente no propoin mundu ida bazeia ba valór sira Maromak nian.

Ikusnian, komunidadade ida-ne’ebé fó sasin: apóstolu sira fó sasin Jezús nia moris-hi’as ho kbiit boot” (vers. 33). Apóstolu sira-nia jestu hatudu serteza prezensa Maromak nian no dinamizmu sira salvasaun nian.

Komunidadade sarani dahuluk, moris husi Jezús no Espíritu nia don, mak tebes duni, komunidadade ida mane no fetu sira-nian ne’ebé fó sasin salvasaun nian no haklaken moris nakonu no definitivu. Dixípulu sira nia fiar, sira-nia uniaun no, liután ne’e, sira-nia partilla soin nian ne’ebé la tuir mundu nia lójika, mak prova boot katak Kristu moris no hala’o nia obra iha mundu, hodi oferese ba ema sira mundu foun ida. Makhorik sira Jerusalém nian labele haree Jezús moris hi’as; maibé buat ne’ebé sira bele haree mak transformasaun boot ne’ebé realiza iha eskolante sira nia fuan, ho kbiit atu manán egoíзму, loko-an no autosufisiénsia no moris iha domin, partilla, don. Moris tuir Jezús nia valór sira mak forma di’ak liu atu haklaken no fó sasin katak Jezús moris.

Komunidadade sarani Jerusalém nian mak komunidadade ida ne’ebé hakarak sai modelu na Kreda no kreda sira tempu hotu nian.

## LEITURA II – 1 Jo 5,1-6

La’ós fasil atu identifika autór Surat Dahuluk João nian. Nia apresenta an nu’udar “Katuas” (kf. 2 Jo 1; 3 Jo 1) no nu’udar sasin “Vida” ne’ebé hatudu iha Jezús (kf. 1 Jo 1,1-3; 4,14); maibé la refere nia naran. Opiniaun tradisionál atribui Surat Dahuluk João (nune’e mós ida Daruak no Datoluk) ba apóstolu João, maski lori problemátika. Buat ne’ebé bele dehan mak, autór surat nian mak ema ruma ne’ebé koñese di’ak João nia mundu no nia teolojia. Karik nia mak “João, Presbíteru” ne’ebé tradisaun primitiva koñese no, nia mak personajen ida lahanesan ho “João, apóstolu” Jezús nian.

La iha mós referénsia ida destinatáriu nian. Parese surat ne’e dirije ba grupu ida kreda sira-nian ne’ebé hetan ameasa husi problema hanesan (erezia sira). Provavelmente, kreda sira Ázia Menór nian (besik Éfeso), tuir tradisaun antiga ida.

Autór la refere mós, ho forma direta, ba sirkunstánsia sira ne'ebé motiva surat nia kompozisaun. Husi nia konteúdu mak hasai konkluzaun katak comunidade sira-ne'e moris krize boot ida. Ho difuzaun doutrina sira ne'ebé latuir revelasaun sarani lori ameasa atu estraga fiar sarani loos.

Autór sira doutrina erétika sira-ne'e nian, autór hanaran “anti-cristos” (1 Jo 2,18.22; 4,3), “profeta lia-bosok nian” (1 Jo 4,1), “lohi-dór sira” (1 Jo 2,22). Sira mak “mundu nian” (1 Jo 4,5) no moris iha espíritu salan nian (1 Jo 4,6). Molok ne'e sira pertense ba comunidade sarani (1 Jo 2,19); maibé sira sai no buka dada sarani sira ne'ebé fiél (kf. 1 Jo 2,26; 3,7).

Erétiku sira-ne'e hanoin sira “hatene Maromak” (1 Jo 2,4), “haree Maromak” (1 Jo 3,6), moris iha komuñau ho Maromak (1 Jo 2,3) maibé moris iha kontradisaun ho revelasaun sarani. Sira lakohi haree katak Jezús mak Mesias (kf. 1 Jo 2,22) no Maromak nia Oan (kf. 1 Jo 4,15), rekuza enkarnasaun (kf. 1 Jo 4,2). Ba ereje sira-ne'e, Kristu lalehan nian tama iha Jezús Nazaré ne'ebé ema de'it, iha Batizmu (kf. Jo 1,32-33), uza nia atu hatudu revelasaun no molok nia terus, husik tiha nia, basá Kristu lalehan nian labele terus. Komportamentu morál ereje sira-ne'e nian la loos: sira hanoin sira la iha salan (kf. 1 Jo 1,8.10) no sira la moris tuir ukun-fuan sira (kf. 1 Jo 2,4), ho modu partikulár ukun-fuan domin nian (kf. 1 Jo 2,9). Buat ne'e hotu hatudu katak ne'e mak movimentu pré-gnóstiku ne'ebé, ikusmai sai movimentu boot gnóstiku sékulu II nian.

Objetivu autór Surat nian mak fó hanoin ba sarani sira kontra erétiku sira-ne'e nia hanorin no esplika ba sira kritériu sira moris sarani auténtiku nian. Iha konfuzau ne'ebé doutrina erétika sira hamosu, autór hakarak oferese ba sarani sira serteza ida: sira no la'ós profeta lohi-dór sira-ne'e mak moris iha komuñau ho Maromak no soi vida divina.

## *MENSAJEN*

Kritériu moris sarani auténtiku mak sá de'it?

Uluknanai, sarani loos mak sira-ne'ebé hadomi Maromak no hadomi mós Jezús Kristu, Oan-Mane moris husi Maromak (vers. 1). Jezús Nazaré mak, kontráriu ba buat ne'ebé ereje sira dehan, mak Maromak nia Oan-Mane husi enkarnasaun no durante nia moris tomak iha rai. Ninia terus no mate mós halo parte projetu makso'in Maromak nian (vers. 6).

Hadomi Maromak signifika kumpre ninia ukun-fuan sira. Bainhira ita hadomi ema ruma, ita buka halo hahalok obra sira ne'ebé fó ksolok ba ema ne'ebé ita hadomi... Ita labele dehan ita hadomi Maromak se ita la kumpre nia ukun-fuan sira... Nia ukun-fuan mak hadomi ita-nia maluk sira. Ema hotu ne'ebé konsidera an Maromak nia oan no pertense ba família Maromak nian, tenke hadomi maun-alin sira membru família rasik. Ema ne'ebé la hadomi Maromak labele halo parte família Maromak nian (vers. 2-3).

Halo nune'e ema ne'e manán mundu. Hadomi Maromak, hadomi Jezús no hadomi maun no biin-alin sira signifika harii moris rasik iha dinámika ida domin nian; signifika manán egoíзму, ódiu, injustisa ne'ebé karakteriza mundu nia dinámika (vers. 4-5).

Jezús Kristu mak oferese moris foun ne'ebé halo atu sarani sira manán mundu. Vida foun ne'ebé Jezús mai oferese, to'o ba ema sira liuhusi “bee” (Batizmu – katak adezaun ba Kristu no ninia proposta) no liuhusi “raan” (atu dehan Jezús nia moris, saran iha krús tan domin). Espíritu Santu atesta validade no lialoos proposta Jezús nian, nu'udar Aman Maromak nia mandatu (vers. 6).

Bainhira ema hatán ho modu pozitivu ba dezafiu ne'ebé Maromak halo ba nia (Batizmu), nia oferese nia moris nu'udar don ida ba Maromak no maun no biin-alin sira (tuir Kristu nia ezemplu) no kumpre Maromak nia ukun-fuan sira, manán mundu, sai Maromak nia oan no membru Maromak nia família nian.

## EVANJELLU – Jo 20,19-31

Ita kontinua ho parte daruak Evanjellu João nian, iha ne'ebé apresenta mai ita comunidade Aliansa Foun nian. Indikasaun katak ita iha “loron uluk semana uluk nian”, dala ida tan, halo referénsia ba tempu foun ne'ebé Jezús lori mai ho ninia moris-hi'as, tempu kriasaun foun nian.

Komunidade ne'ebé moris husi Jezús nia obra halibur hela iha senákulu, iha Jerusalém. Komunidade ne'e laran-surar no ta'uk, haleu ho funu-balu sira. Sira-nia ta'uk ne'e tanba sira seidak halo esperiénsia Kristu moris hi'as nian.

### MENSAJEN

Testu ne'ebé propoin mai ita fahe ba parte rua lahanesan.

Parte dahuluk (vers. 19-23), haktuir Jezús nia “mamosuk”/aparisaun ba dixípulu sira, Haktuir tiha situasaun inseguransa no fragilidade komunidade nian (rai nakukun, odamatan taka metin, ta'uk), autór apresenta Jezús iha komunidade nia “klaran” (vers. 19b). Hodi mosu “iha sira nia leet”, Jezús asume nu'udar pontu referénsia nian, fatór unidade nian, uvas-hun ne'ebé ho sanak sira. Komunidade haleu Jezús, basá Nia mak sentru no iha Nia mak hotu-hotu ba hemu moris ne'ebé halo sira manán “ta'uk” no mundu nia rai-kunan.

Ba komunidade ne'ebé taka an, ho ta'uk, falun an iha nakukun mundu ida ne'ebé rai-kunan, Jezús tranzmite dame ba dala rua (vers. 19 no 21: ne'e mak “shalom” ebraiku, iha sentidu armonia nian, serenidade nian, hakmatek nian, konfiansa nian, moris nakonu nian). Dixípulu sira hori ohin ba oin sei la iha tan razaun atu ta'uk, tanba Jezús manán tiha buat ne'ebé sira ta'uk (mate, opresaun, mundu nia hirus).

Hafoin (vers. 20a), Jezús hatudu ninia “identidade”: iha nia liman no iha nia sorin ne'ebé sona borus, ita hetan sinál sira nia domin no saran an nian. Iha sinál domin no saran an nian mak komunidade rekoñese Jezús moris no presente iha nia leet. Haree “sinál” sira ne'ebé hela metin nafatin iha Jezús, hatudu Jezús nia domin ne'e hela metin nafatin: Nia mak Mesias ne'ebé hadomi no husi nia suli bee no raan ne'ebé harii no habiit komunidade.

Tuirmai (vers. 22), Jezús “huu iis” ba dixípulu sira haleu Nia. Verbu uza iha-ne'e mak verbu hanesan ho testu gregu Gn 2,7 (bainhira hateten katak Jezús huu iis ba ema tahu nian, hodi fó ba nia Maromak nia moris). Ho “huu-iis” Gn 2,7 nian, ema sai ema moris; ho “huu-iis” ne'e, Jezús tranzmite ba dixípulu sira moris foun ne'ebé halo sira ema foun. Oras-ne'e, dixípulu sira soi ona Espíritu, Maromak nia moris, atu bele – hanesan Jezús – fó an ho laran-luak ba ema seluk. Espíritu ne'ebé harii no anima komunidade Jezús nian.

Iha parte daruak(vers. 24-29), autór apresenta katekeze ida kona-ba fiar. Oinsá mak ema to'o ba fiar iha Kristu ne'ebé moris hi'as?

João hatán: ita bele halo esperiénsia fiar nian iha Kristu moris no moris-hi'as iha komunidade fiar-na'in sira-nian, katak fatin naturál iha-ne'ebé manifesta no naksira Jezús nia domin. Tomé reprezenta sira ne'ebé taka an rasik (iha li'ur) no la interese ba komunidade nia sasin, la haree mós sinál sira moris foun nian ne'ebé hatudu iha komunidade. Envezde integra an no partisipa esperiénsia hanesan, nia buka atu hetan demonstrasaun partikulár Maromak nian.

Tomé, ikusmai, halo esperiénsia Kristu moris hi'as nian iha komunidade nia laran. Tanba sá? Tanba iha “Na'i nia loron” nia fila fali ba komunidade. Ne'e mak aluzaun momoos ida ba Domingu, loron ne'ebé komunidade halibur hamutuk atu selebra Eukaristia: iha enkontru ho domin fraternu, ho maun-lain sira nia perdaun, ho Liafuan ne'ebé haklaken, ho paun ne'ebé fahe ba malu, mak deskobre Jezús moris-hi'as.

Esperiénsia Tomé nian la'ós eskluziva sasin dahuluk sira-nian; sarani hotu tempu hotu nian bele halo esperiénsia hanesan.